

't **Limburs** **Vastelaovesleedjes** **Konkoer**



Finale

vriedig 9 fibrewari 2001

Jo Gerrishal, Neel



**AUTOSCHADE
PETER BROUWERS BV**

Roermond



STERK IN VAKWERK



Pisters financieel

geluk verzekerd

Roermond



Rabobank

Roermond e.o.



at all internet-services

Roermond

't Limburgs Vastelaovesleedjes Konkoer

Finale

Vriedig 9 fibrewari 2001

Jo Gerrishal, Neel (Roermond)

Prissentatie: Alf Poell

Orkes: Neelder LVK Orkes

Samesjtèlling:

Jos Cremers, Gelaen; Sjtichting LVK.

Drök en aafwèrking:

Van der Linden, Drökkerie en Sjtempelfebrik Gelaen.

Stichting LVK:

***Postbus 1625 - 6201 BP Maastricht - e-mail: info@stichtinglvk.nl
www.stichtinglvk.nl - k.v.k. nr. 41071309 - bankrek.nr. 17.05.28.111***



De luiper oet . . .

Kint gier cafe 't Luiperke ?

Ich waal: langs de golfbaan en dan ummer rechdoer, op de rotonde de Grenssjtraot pakke en dan is 't al gauw aan de linkse kant. 't Versjoelt zich get, meh de echte leefhöbbers höbbe dees ónt- en oetsjpanning zieëker weite te vinge. Hie, deep in ós provincie, haet Sjra (P) zien etablissement ingerich. Neet groeët meh waal gezellig. Gein plek vuur HBL's (Hieël Belangrieke Luuj = bobo's = diekke nek), meh vuural e podium vuur kunstemaekers oet de ganse provincie. 'n Deil vinge 't hieël sjpietig dat ze 't groeët podium, dit jaor in "Neel", neet gehaold höbbe. Meh vööl mieë luuj wille laote zieën dat ze gewoon sjpas d'r aan höbbe en in hun eige sjtad of dörp mit hart en zieël get bie wille drage aan de vastelaovend.

Zieëker in dizze tied van 't jaor gónt mien vrouw en ich dèk nao 't cafe van Sjra. De bitterbel van Fien zint rón doet van hoeëg niveau en ónger-tösje zint v'r al zoeë wied dat v'r 't Kirchrödsjer plat van No (de kelner) ouch doer höbbe. En noe mer houpe dat Sjra 't neet in zienne kop haolt óm hoeëger te zinge en te sjpringe es dat zienne sjtek lank is. 't Luiperke mó't 't Luiperke blieve en alle deilnummers aan 't Leedjeskonkoer zouwe de kans mótte kriege dao ins op te trae.

't LVK-besjtuur prebeert, sjuus wie Sjra, 't vastelaovesleedje hoeëg te houwte. 't Is neet te geluive wievööl inzendinge vier elk jaor weer binnekriege (dit jaor tweeëhónderd veer en zieëvetig = 275-1). Bekinde name meh ouch inzendinge van luuj die pès noe toe nog noeëts insjikde. Sjoëen toch, die sjpanning en die luuj die zich de bein ónger 't lief oetlounge vuur kaarte.

Ich rol dizzen aovend de luiper oet: vuur de bèste van de bèste van die nuëgetieën (19) winnaers, meh vuural vuur al die luuj die wie dan ouch de aafgeloupe maonde ein biedrage gelieëverd höbbe. Ich houp dat 't succes van dizze jaorgank hun nog lang aan te zieën zal zin. Besjtuurslede, jurylede, tèllers en baovenal de lede van de "Katers" oet Neel bedankt.

Sjraar Cox

Vuurzitter van de sjtichting LVK.



De fienale LVK 2001 in Neel,

Veur VV "De Katers" oet Neel is het ein grote eer 't grootste limburgse vastelaoves-mezieksjpektakel te moge organiesere. Zo-es ederein wit organieseert de sjtichting LVK same mit L1 radio en tv eder jaor de oet-verkezing van de limburgse vastelaoves-sjlager.

Oet zo'n 275 inzendinge haet ein echte vakzjuriej in 2 sessies (9 en 16 desember) d'r 51 oetgehaold die vervolges in 3 veurrunj (7, 14 en 21 jannewarie) te beloestere ware. De 19 fienaliste waerde bekint gemaak in de radio-oetzending van 28 jannewarie.

Op 9 fibberwarie komme oet alle deile van Limburg de fienaliste mit hun aanhangk nao Neel om in de Jo Gerrishal oet te make waem de limburgse vastelaoves-sjlager 2001 haet gesjreve en gezonge.

Veer haope netuurlik det d'r ein fienaleplaats veur eine neelder deilnaemer is weggelag.

Van hiejoet wille veer alle deilnaemers vööl sukses toewinse.

Det de organiesasie van dit aevenement heel get veut in de aerd haet, sjprik veur zich. Mer dankzij de informatie die veer van de Weertse "Rogsjaekers" en de Belfeldse "Belhamels" gekrege höbbe en de begeleiding van de sjtichting LVK en L1 haope veer det 't veur ederein eine onvergaetelikke aovend geit waere. Ederein dank hiejveur.

Tiedes deze echte limburgse aovend zal door L1 veur ein rechstreekse radio-oetzending gezorg waere. En d'r zal ouch ein tillevisie-versjlaag gemaak waere det inkele dage later oetgezonje waerd.

Veer vinje 't sjoon uch allemaol te moge begroete op dees fienale en winse uch eine sjone, plezierige en veural eine muziekale aovend. Aan de organiesasie zal 't neet ligke.

Leon Hamans
Veurzitter

Thei Hawinkels
Vors





Veurwoord Börgemeister van Remunj,



't Duit os duchtig deug det v.v. De Katers oet Neel oetverkaore is om deze aovend, 9 fibberwari 't Vastelaoves-Leedjes-Konkoer te organisere ónger de vleugels van de Sjtichting Limburgs Vastelaovesleedjes Konkoeer.

Flink greuts zaet de Neelder gemeinsjap dan ouch de ganse Limburgse Leedjeskaravaan welkóm. Vanaovend zolle 19 finaliste sjtrieje om de hoogste eer. Daobie zolle ze entoesjas ongersjteund waere door ontelbare supporters oet de Limburgse vastelaoveswaereld.

In de veurbereijing en de oetveuring vreug dees mega-heppening óntzettend vööl inzet, vinjingriekheid en organisasietalent. Wäörd van lof en waardering veur de organiserende Katers is hie zeker op zien plaats.

Names 't Sjtadsbesjtuur van Remunj zegk ich alle finaliste mit häöre aan hank van herte welkom in oos sjterke gemeinsjap Neel. De organisatie, die zonger twiefel perfek is, garandeert, det geur eine fantastiese aovend gaot belaeve.

De finale waerd haopelik in alle opzichte eine gesjlaagde vastelaoves-topper dae vööl belangsjtelling haet van ein groot pebliek.

Remunj, 9 fibberwari 2001

De börgemeister van Remunj,

Drs. H.J. Kaiser



"De luiper oet, de luiper oet"

Teks : Sjra Puts

Meziek : Sjra Puts & Conny Peters



Foto Jo Goossens, Elsloo

Refrein

De luiper oet de luiper oet d'r is weer eine binne
Gerdiene aop en lampe aan dan kint 't weer beginne
Geer zeet weer ein talent zo as geer nooit ein hōb gezeen
Hiej in kefee 't Luiperke kint nemes toch get zeen
Hiej in kefee 't Luiperke telt eine waal veur teen.

Couplette

As 't löp dan löp 't as 't sjtilsjteit löp 't neet
As 't achteroet geit loupe löp 't vas veur det geer-t weet
Maar löp 't ins neet gans wie des se dachs zoas 't mós
Kom dan maar nao 't Luiperke dan löp 't waal weer los

As se löps let dan good op des se neet op eier löps
Zorg dus det 't sjteeds op rölkes löp dan wits se waas se hōbs
Maar löp se ins verlaore löp 't neet wiej det 't mót,
Kóm dan maar nao 't Luiperke biej ós vings doe nooit bot

In 't Luiperke löp altied alles krek wiej det 't mót
Gesjmeerd, ge-aolied, ingevet det kint nooit meer kepot
Dus löps se laat nog naeve kiek dan aeve door de roet
Hiej in 't kefee 't Luiperke dao löp 't altied oet



Veer make get van niks

Teks : Herman Geenen
Meziek : Hub Lemmens

Artieste : Biejeingeraap
Plaats : Gelaen-Lèntjheuvel

Refrein

*Mit de laepel in de henj en de kaetel òm de nek
bäöme veer hiej oppe baom.
Mit get sjelle en get belle op 'ne ouwe baezemsjtek
kump d'r laeve in de kraom.
't Is mer wieste 't bekiks, veer make get van niks.
Mit de laepel in de henj en de kaetel òm de nek
löp de ganse santekraom.*

Koeplèt 1

*Gaef òs mer 'n träötje of get dèksels in de henj
d'r sjteit medein 'n hermeniej.
Gaef òs 'n paar noate en me zunk van alle kenj
de allersjoanste millediej.
Zèt òs mer geweun 'n vastelaovesheudje op
de ganse tent sjteit oppe kop.
't Is mer wieste 't bekiks, veer make get van niks.*

Refrein

Koeplèt 2

*Gaef òs mer 'n vingerke al is 't nog zoa klein
veer sijnappe drek 'n ganse handj.
Sjtaek mer 'ns 't vlemke aan dan brent 't van allein
en sjteit hiej drek de hël in brandj.
Laot mer 'ns 'n geit op zoamer veur de kloateriej
dat wurt 'n groate fieëspertiej.
't Is mer wieste 't bekiks, veer make get van niks.*

Refrein



Oozen haan

Teks : Harry Jaspar en Paul Booten Artiëste : Harry, Paul en Familie
Meziek : Harry Jaspar en Paul Booten Plaats : Ulestraten

Refrein (2x)

*D'n haan dhè haet de grwatste sjpas
Dao bove op de kèrriktore
D'n haan dreijt drie daag om zien as
Es 't weer vastenaovend is gewore.
Want es bie oos dhè bonte sjtörrem weer geit weije
Begint dat deer van gekkigheid te dreije
Jao, oozen haan zit eeder jaor opnuu
Mèt carnaval in de allerbèste buu.*

Couplet 1

*Al hjiël veul jaore lank mèt veul plezeer
Kik d'n haan hie op oos dörrep neer.
Kik nao d'n optoch, nao de prins en nao de raod
Nao al die vastenaovesgekke die dao loupe op de sjtraot
En es t'em vraogs: "Wie sjteit vandaag de wind?"
Dan kik er weer nao onder en dan geit er door 't lint.*

Refrein

Couplet 2

*Hee geit noe 's aoves neet op ziene sjtek
Dit is veur heum de allersjwanste plek
Dreijt in 't rond, want op de grond sjepeelt ein kapel
Jao van dhè lekkere meziek krieg oozen haan weer hinnevel
En es t'em vraogs: "Wie sjteit vandaag de wind?"
Dan kik er weer nao onder en dan geit er door 't lint.*

Refrein (2x)



Weej haole de 100

Teks : Hannelore Winter
Meziek : Jan Bax

Artieste : Thei & Marij
Plaats : Tegelen

*Weer ein häörke grièzer maar nog aeve moèi
dus 't spiegel dreie weej daoveur neet um
rimpels van 't lache ligge netjes in de ploèi
en daorum, hoebel maar aan dan biste slum
want ouk d'n alde schat, dae wilt nog waal ens wat*

*Weej blieve halde van vervlaoge jaore
en klappe ós wéér in de hand
laot ós now maar preuve van 't laeve
't haet petètjes zat gegaeve
zoeë zalse zeen Zoeë lang we bliève straole
det weej de hónderd nog haole
zoeë plökke weej d'n tied alweer
met alle leefde en plezeer*

*Weer ein jäärke wièzer maar nog net zoeë net
en de slummerike make zich neet bang
straole kump van binne eine knappe dae det wet
jubelzang, hieperdepiep en laeve lang
de vader van d'n tièd, dae steit nog in 't krièt*

*Weej blieve halde van vervlaoge jaore
en klappe ós wéér in de hand
laot ós now maar preuve van 't laeve
't haet petètjes zat gegaeve
zoeë zalse zeen Zoeë lang we bliève straole
det weej de hónderd nog haole
zoeë plökke weej d'n tied alweer
met alle leefde en plezeer (2x)*



Ditte deit ôs nemes nao

Teks : Frank Dullens & Paul Heffels Artieste : Böshuuske Ontsjpannings
Vereeniging
Meziek : Frank Dullens & Paul Heffels Plaats : Bor(n)

Ditte deit ôs nemes nao,
Dat is "jé van hét" ja jao
Ditte deit ôs nemes nao,
Dach geer dat van die déks dao ?
Doon die ôs dat drek hiej nao ?
Dach geer dat van die déks dao ?

*Die probeer 't waal, dat klop tsja jao,
Kiek ze gape die dao, en drek ape ze-os nao*

Ditte deit ôs nemes nao
Dat is "jé van hét" ja jao,
Ditte deit ôs nemes nao

Couplet 1

*Rempetemp reet ôs wakker oet de wentjersjlaop,
Vanaaf vandaag zeen ôs weer ôs auge aop,
Wat is 't sjaon om hiej zoa bontj en bliej te zeen
Wat is 't sjoan om same noe en hiej te zeen,
Gein minsj hoof ôs dat veur te doon,
Dat bezunjere dat hëbbe veer gewoon !*

Refrein

Couplet 2

*Veult geer 't auch noe dat geer dat hiej zoa zeet van ôs,
Denk geer dan auch, ich-wol dat ich dat auch zoa kôs
Hobbél dan mit oppe hoempa van ein hermeniej,
Hobbél dan mit dan komp geer al heal kort derbiej,
Gein minsj hoof uch dat veur te doon,
Dat bezunjere dat hób geer dan gewoon*

Refrein 2x



De mos 't preuve

Teks : Gaston Jacobs
Meziek : Gaston Jacobs

Artieste : Gaston en vrung
Plaats : Ulestraten

Refrein

*De mos 't preuve, de mos 't preuve,
De vastelaovend en dê sjtomme sjêle kal.
De mos 't preuve, de mos 't preuve,
't sjmaak nao mje, dat sjteit zwa vas wie ein en ein is twje,
dan krieg-ste jeuk mê hoof-ste neet te kretse,
dat geit waal euver es te achterein geis vetse.
De mos 't preuve, de mos 't preuve,
De vastelaovend en dê sjêle kal.
(de vastelaovend en dê sjêle kal)*

Couplet

*Whê wêt wat hie biezonder is - veer allemaol
En - dat dat vastelaovend is - veer allemaol
Whê - lach hie mêt z'n gans gezich - veer allemaol
En - hilt zich vas aan dich en mich - veer allemaol
Dus pak uch, pak uch, pak uch noe mêr vas
En haol mêr alles oet de kas.*

Refrein

De mos 't preuve, enz.

Couplet

*Whê is een vastelaovesdeer - veer allemaol
En - hilt van sjpas en vêul plezeer - veer allemaol
Whê - sjnap zich gêêr een pôtsje beer - veer allemaol
En - deit dat noe en dalek weer - veer allemaol
Dus weit v'r, weit v'r, weit v'r van besjeit
Wie dat bie os in Limburg geit.*

Refrein

De mos 't preuve, enz. (2x refrein)



Unne mins kriegt . . . wat hae verdient !!

Teks : Anny en Jacques Everaerts Artieste : Duo Triangel (Anny en Jacques Everaerts)
Meziek : Jacques Everaerts Plaats : Helden-Panningen

Wae motte we heejveur toch bedanke
Wat waere we noow toch weer verwind
Ut laeve det haet zon schoene kante
Wat geit ut os weer veur de wind
Och wat hebbe weej ein laeve
Dit is toch ongekind
Ut is toch ein gegeave
Det unne mins kriegtwat hae verdint

Noow komme weer die daage, van gek daon en plezeer
Weej laote os neet jaage, weej blieve heej zoe geer
Laot os nog wat verteere en det neet eine kier
Nog efkes renteneere, want dit det smak nao mier
De vreugs dich dukker aaf
Zien weej dan zoe braaf...

*Geneete van ut laeve, det steit beej os veurop
Ut wuurd os zoe gegaewe, de kriegs ut g'woen veur nop
En kiek ens nao die minse, dan wetste ut geliek
Dan hoofse niks te winse, de veuls se dich dan ech riek
Dan is ut weer zoe wieht
Ik mot ein rundje kwieht...*



Et trompetje van Jeannetje !

Teks : Ben Erkens

Meziek : Ben Erkens

Artieste : Dik Betaald BéeVée

Plaats : Geleen

Couplet

*Biej ós in de familie, dao zeen ze muzikaal
Mer es veer repetere, geuf dat 'n helsj kabaal
De mam die trök de monika, de pap huijt dikke tróm
Os Truu roffelt et trömmelke, dao geit et beer van óm !*

Couplet

*Tant Bertha bleus de tuba, nónk Sjang de sjuuftromboon
En dao dae clown op saxofoon, dat is mien breurke Toon
Mer woo veer allemaol greuètsj op zeen, dat is ós leef Jeannet
Die sjettert en die tettert ummer op häör klein trompet!*

Refrein

*Et trompetje van Jeannetje
dat heuèrste euv'ral baoven oet
Es zie op häör trompetje toet
dan is d'r stömming in de boet!
Et trompetje van Jeannetje
Dat maak de ganse waereld bliej
Jao, ze bleus ein prach partie
op häör trompet
zoa is ós Jeannet!*

Couplet

*Alaaf veur ós Jeannetje, zie barsj van energie
meziek en vastelaovend, die gaon häör aan de priej
En bläörkes van et blaoze, dat heuèrt geweun d'rbiej
Laot ós Jeannet mer raoze, noe heuèr is nóndepie!*



SCOREBORD

	<i>Born</i>	<i>Horst</i>	<i>Hoofjury</i>	<i>Maaseik</i>	<i>Simpelveld</i>	<i>Heel</i>	<i>Rijckholt</i>	<i>Eindsjtand</i>
1. <i>Veer make get van niks (Lèntjheuvel)</i>								
2. <i>Oozen haan (Ulestraten)</i>								
3. <i>Weej haole de 100 (Tegelen)</i>								
4. <i>Ditte deit ôs nemes nao (Born)</i>								
5. <i>De mos 't preuve (Ulestraten)</i>								
6. <i>Unne mins kriegt...wat hae verdint !! (Helden-Panningen)</i>								
7. <i>D'r loemelekrieëmer (Heerlen)</i>								
8. <i>Et trompetje van Jeannetje! (Geleen)</i>								
9. <i>Vaerder gaon (Venlo)</i>								
10. <i>De sjterre oet de Hemel (Valleberg a/d Geul)</i>								
11. <i>Es de meziek weer klink! (Zitterd-Gelaen)</i>								
12. <i>Es ich dien auge zeen (Hulsberg)</i>								
13. <i>Ut menke met dun hamer (Hegelsom)</i>								
14. <i>Zes gooje in de lotto (Groot-Sittard)</i>								
15. <i>Wo kin ich tich toch van (Gulpen)</i>								
16. <i>'t Volk besjlis (Meerssen)</i>								
17. <i>Good geammezeerd (Ruiver)</i>								
18. <i>De vastelaovend is weer dao (Gelaen)</i>								
19. <i>De sjlager van 't volgend jaar (Neel)</i>								



Vaerder gaon

Teks : Frans Boermans
Meziek : Wim Roeffen

Artieste : De Kammeräödjies
Plaats : Venlo

Vers 1

*As d'r ôs waat kwaelt,
't Ein of ander schaelt.
En as dao beej, gen klage baat,
Zien weej van ôs stök,
Umdet d'r niks mier lök
Dan leve minse, wet ge waat*

Refrein

*Zulle we dan maar vaerder gaon met alder waere
Dan hebbe we tenminste waat te doen.
As weej ôs de bein en ouk de kael good smaere
Dan blieve weej zoë flokker wie ein hoon.
Zulle we dan maar vaerder gaon met aosem haole
Dan blaoze we waal oet zoë tössebei
Det wuurd ôs ouk van herte aanbevao-ao-le, 2x
Wae det vergit, dae duit ouk noëts miër mei. 2x*

Vers 2

*Huer waat ik ôg zeg
'nne Mins haet waal ens pech
En auk al haette det neet gaer.
Det det leid vergeit,
Det weite weej geheid
Dao kump dae bes waal euverhaer*



De sjterre oet de Hemel

Teks : Guus Smeets

Artieste : Hub Bertrand

Meziek : Guus Smeets

Plaats : Valkeberg a/d Geul

Refrein

*lech pluk veur diech de sjterre oet den Hemel
lech houd van diech dat wétste toch al lang
Es veer dan same op de wolke zjweve
Jao dan wétste auch wao iech zoa nao verlang*

Couplet

*lech druim al weke lang van diech mien leefste
lech wél allein mér diech jao diech allein
Alles waste wéls zal lech diech geve
Dien leefde sjat die hélt miech op de bein*

Refrein

*lech pluk veur diech de sjterre oet den Hemel
lech houd van diech dat wétste toch al lang
Es veer dan same op de wolke zjweve
Jao dan wétste auch wao iech zoa nao verlang*

Brug

*lech koup veur diech 'n landhoes en iech koup diech nog vâöl mjié
Dan beleve veer ,n sprookje jao ,n sprookje veur oes tjwié*

Refrein

*lech pluk veur diech de sjterre oet den Hemel
lech houd van diech dat wétste toch al lang
Es veer dan same op de wolke zjweve
Jao dan wétste auch wao iech zoa nao verlang*

*mmmmmm mmmmmmm mmmmmmm mmmmmmm
Es veer dan same op de wolke zjweve
Jao dan wétste auch wao iech zoa nao verlang*



Es de meziek weer klink !

Teks : Ben Erkens
Meziek : Ben Erkens

Artieste : Anja Bovendeaard
Plaats : Zitterd-Gelaen

Couplet

*Ich höb et noe al jaore
Ich kèn d'r niks aan doon
Et zit bieje mich al heël lang in et bloud
Ich bèn d'r mit gebaore
en vènj et toch zoo sjoon
Et deit mich richtig goud!*

Refrein

*Es de meziek weer klink
Is de zón weer veur ós dao!
Es al dat koper blink
Loupe veer et achternao!
Dan zèt ich al mien zörg opziej
en vuil mich vriej en bliej
Es meziek klink
Dan bèn ich d'rbiej!*

Couplet

*Soms höb ich van die daag
vuil ich mich opgebrend
dan höb ich ouch veur niks meè energie
Mer dan inèns op sjlaag
vuil ich mich weer content
en rammelt mich de priej!*

Couplet

*En is et Vastelaovend
blaos ich èns effe oet
dat doon ich ummer driej daag aan ei sjtök
Dan loup ich jedere aovend
te blaoze op mien toet
en euver van gelök!*

Sjlotregels

*Kóm zèt èns gaw dien zörg opziej
en vuil dich vriej en bliej
Hiej in Limburg
heurt meziek d'rbiej!*



Es ich dien auge zeen

Teks : Maurice Pluijmakers

Artieste : De Drie Geliënde
& 't Geliënde-koär

Meziek : Maurice Pluijmakers

Plaats : Hulsberg

Refrein

*Es ich dien auge zeen bin ich verloare,
es ich dien möndje puën bin ich verkoch.
Leeve sjat, doe bis get sjoäns gewoore,
joa noa dich höb ich mien laevelang gezoch.
En zoä geit d'n hemel oape,
diene lach, dae maak mich toch zoä blie.
Es ich 's oaves laat goan sjloape,
sjtoan dien auge en dien möndje mich nog bie.*

Couplet 1

*Joarelang höb' veer os al neet mië gezeen,
v'r woare kinger in de greuj.
Mè noa d'n iërsjte blik kin ich neet om dich heen,
noe is de bloom in volle bleuj.
Ich höb die bloom gepluk,
ze zègge "wat ein sjtuk!"
Ich höb gewach en noe höb ich geluk.*

Refrein

Couplet 2

*Al daen tied woar ich es vriegezel allein,
ich wos neet wat verleef zin is.
Mè sjattebout, noe zin v'r mit z'n twië bie-ein,
noe weit ich wat ich höb gemis.
Och heij ich es 't kos
dat iëder al gewos,
Nou ja, de zuus; 't löp vanzellef los.*

Refrein (2x)



Ut menke mit dun hamer

Teks : Johan Bertrams
Meziek : Johan Bertrams

Artieste : DubbelOp
Plaats : Hegelsom

Refrein

*Ut Menke mit dun Hamer, daat hêd ut aalt gedoan.
Dì blief ma iederes kier op òs bôlke sloan.
En niemand, né niemand deen hêd um oeits gezeen.
Ma waat ie deut daat sliët geweldig in.
Want elke slaag dî ge 'smerges veuld.
Is wal vaan um, ma ziedde zelluf schuld.
Ut sloog wer aallus gen rundje leette stoan.
Ut Menke mit dun Hamer daat hêd ut wer gedoan.*

*Joa iederiën din hêd, un menke in de kop.
Umdaat ie noeit waat zaet, velt ie ow nag amper op.
Ma hedde iets te viere en smaakt ut wer noa mier.
Daan zal ie ow us liere "teveul is nag aalt verkierd!"*

*Ut gekke joa daat is, de slaeg die geej dà veuld.
Die ziën beslis nî mis, ma toch kriedde genne bult.
Probeer ut nou te snappe want anders kriedde spiët.
Da valle d'r wer klappe ge raakt um noeits miër kwiët."*



Zes gooje in de lotto

Teks : Guus Steinen

Artieste : Kartoesj

Meziek : Guus Steinen

Plaats : Groot-Sittard

*zös gooje in de lotto en 'n maedje zo wie doe,
dat wunsj ich mich, dat wunsj ich mich al joare.
lekker laeve waar mien motto, doe en ich , en ich en doe
gein minuut van d'n daag ging ôs verloare.
zoa wie de wèndj wejt, wejde dan mien humme
en ich zouw 't d'r ederen daag 'ns good van numme
joa dat deeg ich joa dat deeg ich allenej,
es ich dich en die zös gooje hej.*

*as ich 'ns neit sjloape kèn, en om veier oer sjnachs nog wakker bèn,
dan kump dat meis door dich !!
dan zeen ich ôs – en dat is sjoan – same door 't laeve goan
doe same mit mich.!!
dan vraatsjel ich van rechs noa lènks, in de houp datstoe dat auch get vènks,
en as 't eave zo koosj goan,
zeen ich de lotto-belkes valle, wie ich ze op 't formeleer hób sjtoan.
mesjiens waal twintig keer per daag, is 't beeld dat ich zo bie mich draag,
dat köpke van dich.
ich krieg dich neit oet miene kop, wat ich auch doon..., ja nuim mer op.
'ch zeen ummer dien gezich
en drek denoa, wat ich auch wil, zeen ich alle zös die lotto-bel
en 't zinde nummerkes van mich!!
zal 't dan ech nog oats gebeure?
dat 't waarheid waere geit veur mich!!*

*dan doon ich allebei mien auge toe
dan denk ich haw ich dat gelók toch mer 'ns noe...
doe aaijdes mich dan gans d'n daag de bølles,
en doe zoats mich ummer ummer aan de gölles
sjwomme in 't geldj wie Dagobertje Duck.
herboare-aafgesjwoare-amore-verloare
bankbiljetten niet mee wirke vekantie 'nne boat.
aan cente hej ver gein gebrek
doe sjwom ver in bes tot aan oze nek
mer drek drop wurd mich kloar
verrek 't is gaar niet waar
mer ich ben nog ummer
mer erm en gans allein
einzaam ben ich sjteeds wakker gewore.*



Wo kin ich tich toch van

Teks : Michel Nita
Meziek : Michel Nita

Artieste : Frans Croonenberg
Plaats : Gulpen

Refrein

*Wo kin ich tich toch van, wo kin ich tich toch van
Sjriefs te dich Lies of heisj tich Marian
Bis tich toch neet zo sjoew en zegk 't mich dan
Wo höb v'r os gezieë, wo kinne veer os van
Wo kin ich tich toch van, wo kin ich tich toch van
't Ligk mich op de tong maedsje help mich dan
En es ich mich dan toch vergis
Is dat neet erg, met tich is gaar niks mis*

Couplet 1

*Ich sjtong hiej al 'n tedsje aan de teek wie ich tich zoog
Ich dink dat maedsje kinste toch ich weit woraan dat loog
Ich zoog dat leef gezich van dich 't is good dat ich mich sjaam
mer noe ich hiej bie dich sjtoon kom ich neet op dienge naam*

Couplet 3

*'Chweit zieëker dat ich tich al ins gezieë höb op dit bal
Ut zal ein jaor geleije zieë 'twaor ooch mit carnaval
Es ich mich neet vergis dan höbbe v'r miteej gedans
Kom maedsje maak 't neet zoë sjpannend gef mich nog ein kans*



't Volk besjlis

Teks : Leon Volders

Artieste : Leon en Luc Volders en de
Vovacobavos

Meziek : Leon Volders

Plaats : Meerssen

Couplet 1

*Eder jaor met carneval dan weurd toch weer besjlis.
Wae van alle leedsjes noe de boot weer haed gemis.
't Is dan soms ein gekkehoes, eine verwarde boel.
Mè toch keump alles good terech, de waörd van Alf Poell:*

Refrein

*'t Volk besjlis, 't volk besjlis
Mot de jury dat neet doon
't Volk besjlis, 't volk besjlis
Wa veer dit jaor op springe goon
't Volk besjlis, 't volk besjlis
Wai haed 't schwanste leed
't Volk besjlis, 't volk besjlis
En wai haolde 't net neet
't Volk besjlis, 't volk besjlis
Is veur ôs de beste kreet*

Couplet 2

*Nao de jhërste schifting mot 't volk aan de schlaag.
Bône weure ingevuld, 't is allemaol nog ghèt vaag.
De jury telt en telt en telt, 't volk haed besjlis.
Mè toch is volges ôs aan dees formule nog ghèt mis.*

Couplet 3

*Dan keump de finale en dat is pas grandioos.
Al beste hie al beste dao, dao is altied waal ghèt loos.
Oeteindelik wint toch altied 't beste oet de stal.
't Gezegkde dat 't volk besjlis, is geine scheile kal.*



Good geammezeerd

Teks : Arnold Wassen
Meziek : Arnold Wassen

Artieste : Dèt môt kenne
Plaats : Ruiver

Refrein

*Höb ich mich gisteraovend nag good geammezeerd...
en môt ich nag get betale?
Waem haet d'r gister allemaol van mich geprofiteerd...
en toen 't beer laote versjale?
Wat zaes ze: "Höb ich aan de lampekap gehange...?
en toen 't Vogelnesje' nag ens geprobeerd?"
en bön ich toen door die eike taofel haer gegange....?
Den höb ich mich gisteraovend good geammezeerd!*

Couplet 1

*Ich bön op sjtap gewaes met ein hiël gezellig sjtel;
..... begôste hiël veurzichtig, mêt later ging 't hel.
Mêt noë bôn ich vergaete wat ich höb gedaon;
waas ich mêt oppe tiëd nao hoës gegaon.
Ich höb de kastelein gebeld,
en toen de vraog gesjteld:*

Couplet 2

*Jao, det is lang geleje, dae tiëd kump néét miër truuk...
De letste jaore haaj ich mich miër en miër kaduuk...
Noë wil ich gaer vergaete wat ich höb gedaon;
mêt ich waas jônk en dach: "Noë laot mêt gaon!"
Mêt toch waerd't noë nag dök verteld...
Det ich toen höb gebeld:*



De vastelaovend is weer dao

Teks : Marij Suyk
Meziek : René Krans

Artieste : Ónger ein
Plaats : Gelaen

1e Koeplet

*òs sjtik de brats dat maog geer weite
dat hōb veer eēder jaor
es vastelaovend is begōnne
dan sjtaon veer kantj en klaor
want vastelaovend mōste viere
drie daag zōnger taboes
't maak niks oet wieste verkleid bès
es pater, kloon of moes*

(Tösje regel)

*de vastelaovend is weer dao
't zin de sjoanste daag van 't jaor*

Refrein

*kòm en doot 's mit òs mit
neet zoa sjtief in 't gelid
gaef 'm noe 's van ketoen
maar hawt waal uch good fatsoen
drie dol daag zeen zoa verbiej
lach en sjprèng, loup in 'n riej
(1e keer) polonaize achterein, oppe sjtraot of euver 't plein
(2e keer) gaef 'm noe 's van ketoen, sjtraks sjtaon veer weer op rantsoen*

2e Koeplet

*de mam, de pap en auch de kènjer
die pakke zich biejein
veer zeen dees daag neet toes te vènge
't dōrp is te klein
mer es esjgoonsdig dan verbiej is
dan zeen veer gans bek-aaf
doa wil veer noe nog neet aan dèngke
daorum nog eine keer alaaf!*

(Tösje regel)

Refrein 2x



De sjlager van 't volgend jaor

Teks : Ton Custers
Meziek : Ton Custers

Artieste : Bienao te laat
Plaats : Neel

Refrein

*Dit is de sjlager van 't volgend jaor
veur dae van dit jaor zit ich mit de henj inne haor.
Dit is de sjlager van 't volgend jaor
want dae van dit jaor dae is nag lang neet klaor.
De allereerste neutjes haaj ich inne kop (ta ta, ta ta)
mer daonao woor ineins de inspiratie op
Dit is de sjlager van 't volgend jaor
want dae van dit jaor is volgend jaor pas klaor.*

Koeplet

*Ellef jaor haaj Harie al ein uigske op Marie,
M'rie det woor 't sjoonste maedje vanne hermenie.
Bloos wie eine maerel klarinet
en Harie deej zien bès oppe trompet.
"Sjrief veur mich de allerbeste sjlager van 't jaor,
den sjtaon ich veur dich mit de vastelaovendj klaor."
Det haaj 'm zien Marie gezag,
mer nieks wol lökke es hae aan hör dag.*

Koeplet

*Harie zoot te zijweite en hae bloos op zien trompet
zeukend nao ein neutje veur Marie zien klarinet.
Mer sjeelde hae den weer die hoge C
den haaj hae daonao gaar gein flauw idee.
Toen zoog hae zien Marie die zag Harie kom 's hiej,
ich kén toet volgend jaor waal wachte op die melodie
want ich dink aan dich allein
en same zóng zie toen 't refrein.*



Wie haet ut "Josefien" vergaon ?

Wie mich begin december gevraag woort um ein veurwäördje te schrieve in ut programma bukske van de finale van ut LVK in 2001, woort mich geliëk d'r beej verteld det ut neet te lang môch zien. Ein kentje van ein halluf A4-tje waas zat. Ik heb toen maar geliëk gezag det det wat mich betref ônmeugelik waas, umdet ik euver **"Josefien"** intösse waal ein gans book kin schrieve. Waat zô'n mins neet allemaol tewaeg kin bringe. Veur ik ut vergaet, ik môt ôg allemaol de hertelikke groete van um doon en doorgaave det ut d'n bônte storm ut aafgelaupe jaor good doorstaon haet. Ut waas ein verschrikkelik zwaor jaor maar ut haet d'r met volle teuge van genôte. Waat det betref kin ik ut verhaol van ôs veurgengers, ut Merretkoer, volledig ônderstrepe. As geej ôg now allemaol efkes de meujte neemp um eur veurwäördje nog ens te leze, dan kin ik inderdaad volstaon met det halluf A4-tje.

In de finale van 'n LVK kômme is al 'n geweldige ervaring, tenslotte is 't d'r beej zien, belangrieker dan winne, maar um dan toch te meuge winne is iets waasse metgemak môs hebbe um te begriepe waat det beteikent. Natuurlik haop idderein stiekem unne kiër as winnaar dao op die buun te meuge staon. Det is gezônde ambitie. Maar as ut dich dan ech euverkump dan is det ein ônbeschrijflik geveul. Det weej det met ôs **"Josefien"** hebbe meuge metmake zal ik dan auk mien laeve lang neet miër vergaete. Op 't moment det det bekind gemak wuert, wetse ech neet miër ofste van veur of vanachter leeft.

Alles en idderein kump op dich aaf en efkes waanse dich ein monument. Dit geit gelökkig hiël gauw euver en det is maar good auk, want nao ut weekend geit ut normale laeve weer gewoën vaerder. Tiedes de vaste-laovusperiode is **"Josefien"** daag en nach in de weer gewaes. Wo se auk kwaams, **"Josefien"** waas d'r auk. Maar ja, det is de konsekwentie asse ut LVK wins. **"Josefien"** haet det now auk geweite.

Wie allen heissa ein bietje achter de rök waas, zien Wiel en Gé (de zengers) en ôndergeteikende, same met **"Josefien"** op vakantie gewaes. Umdet **"Josefien"** persé in Limburg woel blieve, zien we maar nao ein of ander grintgaat in Zuid-Limburg gewaes. Dao haet ut zich good kinne oetrôste veur ut nieje seizoen, want now haet ut de smaak ech te pakke. Door ut moeie weer is ut auk flink broen gewaore, maar det geit d'r vanzelf waal weer vanaaf.

Veur vanaovund winse weej idderein, auk names **"Josefien"** huel vuel sukses en wae d'r auk maag winne, weej gunne 't eur van herte en haope



der zeej net zô'n moej jaor maage kriege, as weej hebbe gehad (en wae twiefelt dao aan?).

Vuel plezeer en vuel sukses veur idderein en alves eine zalige vaste-laovund.

Wim Roeffen

Euverzich Winnaars 't Limburgs Vastelaovesleedjes Konkoor

JAOR	PLAATS	TITEL / TEKSDICHTER	COMPENIS
1977	Mestreech	<i>Vaan Eysde tot de Mokerhei</i> , B. Salden	J. Innemee
1978	Oppe Reuver	<i>De zaagte geej</i> , A. Wassen	J. Theelen
1979	Gelaen	<i>Dan kal ich plat</i> , B. Erkens/T.Arts	B. Erkens/T. Arts
1980	Zitterd	<i>De beierheering</i> , H. Wijnands	H. Wijnands
1981	Remunj	<i>De vastelaovend heurt bieje Limburg</i> , N. Reijners	N. Reijners
1982	Guttecoven	<i>Zoa moosj 't kenne blieve</i> , G. Steinen/J. Wauben	G. Steinen/ G. Wauben
1983	Gelaen	<i>Mie Limburgs blood</i> , M. Zijlstra-de Loo	B. Erkens
1984	Meerssen	<i>Dao moste mèt ljerre léve</i> , L. Volders	L. Volders
1985	Gelaen	<i>Hawt 'm vas de vastelaovend</i> , J. Ridderbeekx	B. Dijks
1986	Mestreech	<i>Jao heij in Limburg</i> , J. Duchateau	J. Duchateau
1987	Linne	<i>Wiebölle</i> , P. Evers	J. Evers
1988	Venlo	<i>Minse wie weeje</i> , F. Boermans	G. Aerts
1989	Venlo	<i>De knappe(rikke)</i> , F. Boermans/G. Aerts	F. Boermans/ G. Aerts
1990	Gelaen	<i>Ich tik neet richtig</i> , M. Zijlstra-de Loo	B. Erkens
1991	Venlo	<i>Det is ein joekskepel op joets</i> , S. Maaskant	J. Jacobs
1992	Venlo	<i>Waat hebbe we 't toch good</i> , F. Boermans/G. Aerts	F. Boermans/ G. Aerts
1993	Tegelen	<i>'nne Late</i> , P. van den Akker	P. van den Akker
1994	Venlo	<i>Heej of dao</i> , G. Aerts	G. Aerts
1995	Horst	<i>De ganse santekraom</i> , C. Kuipers	T. Kleeven
1996	Mestreech	<i>Dreije !!</i> , U. & B. Garnier	U. & B. Garnier
1997	Venlo	<i>Had ik maar</i> , F. Boermans	J. Gubbels
1998	Ulesjtraote	<i>Opzie, Opzie, Opzie</i> , G. Jacobs	G. Jacobs
1999	Maastricht	<i>Iech höb diech weer gevoonde!</i> Bert & Ursula Garnier	Bert & Ursula Garnier
2000	Venlo	<i>Josefien</i> , Wim Roeffen & Frans Boermans	W. Roeffen



ACCOUNTANTS EN ADVISEURS

Sittard/Roermond

**Verfindustrie
Jac Eyck bv**



**DE sikkens
GROSSIER**

PROFESSIONALS MET HART VOOR UW ZAAK

Heerlen
Maastricht
Geleen
Venlo
Roermond



Sittard

ARS

**GRAFISCHE PRODUCTIES &
COMMUNICATIE**

Roermond



Actief in Gezondheid



Rabobank

Limburger
Weekbladpers



FAIR PLAY
CENTERS

DAGBLAD DE LIMBURGER

UW BAND MET DE REGIO.